

HAYA SA KICO TA SCHUTTERIJ

Skirbi pa H. Emerencia.

Diadomingo, 1 di December 2002 a celebra e promer "Dia di Schutterij." Esaki tabata pa honra e ex-Schutterman y ex-V.K.A. nan cu na un bida ainda y duna nan e reconocemento. Lo cu nan mester.

Directiva di Stichting "Herdenking Schutterij Aruba," (consistiendo di e señores Henrico Emerencia, Karel Jozef van Meeteren, Hubert Theodor (Shon) Lopez, Rómulo Jozef (Mooi) Frank, Johann Conrad (Johnny) Oduver, Apolonio (Pooi) Werleman, José María Dania y Oscar Antonette), ta extende un palabra di agradecimiento na tur esnan cu tabata presente kende, cu nan presençia, a muestra nan aprecio pa Schutterij.

Kico ta Schutterij? Schutterij ta number di e Cuerpo Militar di hobenan di Aruba cu den tempo di Segunda Gera Mundial, durante siete aña, hunto cu Aliadonan (Ingles, Francés y Americano) a defende Aruba cu un disciplina y dedicacion admirable.

Awe Schutterij ta lubida y su bon trabao no ta worde recorda ni reconocí di aprecio. Si no luma medida awor, anto dia e ultimo ex-Schutterij muri, Schutterij lo ta lubida pa semper. Esei lo ta malo pa historia di Aruba. Pesei algun ex-Schutterij a funda e Stichting cu e meta di ranca Schutterij for di olvido, duna e reconocemento cu e merece y procura pa e no worde lubida nunca mas.

Si un hende no conoce un cos, e no sa ki balor e tin y e no por aprecio. Pesei e promer cos cu mester worde haci ta, di conta pueblo, especialmente esnan cu ta menos di sesenta aña di edad, kico Schutterij tabata, kico el a haci y com e a comporta.

Dia gera a cuminsa na 1940, Aruba tabata den su gloria. Tabatin dos refinera, di cual uno, Lago, tabata esun mas grandi di mundo. Trabao tabatin na cantidad y, despues di Estados Unidos, Aruba tabata e lugar cu tabatin e sueldo mas halto di mundo. Ta net e circunstancianan aki a causa cu a surgi un amenaza y un peliger grandi pa Aruba. Como cu e refinarian tabata suministra combustible pa Aliadonan, Hitler a duna orden pa destrui e refinarianan di Aruba. Segunda Gera Mundial tabata un "gera total." Esei ta nifica cu e nacionan na gera no ta limita nan mes na destrui solamente obhetu y hende netamente militar. Den caso di Lago nan lo trata di mata tanto trahador cu tabata posibel. Tambe lo a trata di desestabiliza Aruba, por ehempel, destrui e planta di awa y e tankinan di awa. Tambe sabotear e suministro di electricidad y e servicio di telefonia y telefonia.

Consecuencia di esaki lo tabata cu hopi hende lo mester a bandona Aruba entre nan hende cu tabata traha na Lago. Tambe nan lo a haci uso di simpatisanten di e regimen Nazi, N.S.R.s, ende, hende cu la biba den e pais mes, den e caso aki, Aruba. Nan ta constitui un peliger grandi, pasobra ningun hende sabel kende nan ta. Pesei mester a vigila contra enemigo cu por a bini di afor, y contra enemigo cu tabata aki na Aruba mes.

Na 1940 Schutterij a worde institui. E Schutterman a worde incorporá den un di e siguiente categorianan:

1. Infanteria ligera.
2. Zware Wapens.
3. Kustbatterij.
4. Onderzoekingsdienst.
5. Ademans: V.K.A.
6. E tarea di e Schutterman, tabata: Defende integridad di Aruba. Como Aruba tabata parti di Reino Hulandes, Schutterij en efecto tabatin e tarea di defende Reino Hulandes, un responsabilidad primordialmente di Madre Patria.
2. Defende e refinarianan Lago y Eagle.
3. Defende e planta di awa L.W.V. (Landswatervoorzieningsdienst) y e tankinan di awa.
4. Defende e suministro di electricidad.
5. Defende e servicio di telefonia y telefonia.
6. Vigila rond costa di Aruba, dia y anochi.

Des de tur habitante di Aruba di moda cu nan por bira y traha tranquil y sigur. Lago nos duna un ehempel. Enemigonan bibando aki tabata kier sabotear e planta di awa. Nan no por a yega cerca, pasobra tabatin Schutterman na warda aya. Anochi nan ta busca un

bon sitio y sconde cerca e lugar caminda e hendenan mester sali. Na cambio di warda, ora tin hopi hende ta sali hunto, nan ta tira nan tur mata y hui bay. Nan no por a haci esei, pasobra Schutterman tabata semper alerta. Pa e Aliadonan tabata particularmente importante cu esnan cu tabata traha na Lago y Eagle por a haci esaki bon y sin interrupcion.

E Schutterman a desempeña nan encargo na un manera sublime, pero nos ta realiza nos mes cuanto trabao esaki a exigi di nan, y cuanto sacrificio di nan familia?

Pa parti di Schutterman: E cantidad di ora cu nan mester a traha tabata hopi. Nan mester a lanta seis or y traha di sief or te cuat'or, practica, train, haci ehercicio. Na principio cada dos dia, despues cada tres dia, y dia tabatin hopi Schutter cada cuater dia tabata dia di warda, es decir, ora trabao caba cuat'or, ta bay haci warda te su manece sief or di mainta, y e ora ei ta cuminsa cu e trabao normal di e dia ei. Fuera di warda tabatin piket. Nan mester a keda den camp pa haci tur sorto di trabao.

Pa mas tabatin hopi "meerdagse oefeningen." Nan tabata bay mondi pa dos te cuater dia y train durante dia y durante anochi, pa sifa conoce bon e diferencia entre e manera cu cosnan ta parce, muestra y zona den dia y e manera cu nan ta haci esaki anochi. E training tabata basa riba situacion di gera, rigoroso y pisa. E sueldo tabata 3.50, despues 4.20 pa siman.

Pa parti di e mayoran:

Ora mayoran a cuminsa alegre cu awor cu e yiu a cumpli 18 of 19 aña e lo cuminsa yuda na cas, a resulta cu envez di e yiu yuda, ta nan mester a yuda e yiu, pasobra loke e tabata gana no tabata yega ni pa e compra un paki di sigaria. Tabatin mayor cu 2, 3, 4, y hasta cinco yiu sirbendo patria den servicio militar. Ta berdad si, cu hopi mayor tabata haya "kostwinnersvergoding", pero no tabata tur.

E manera riba cual e mayoran, y enberdad henter Aruba a para tras di Schutterman, apoya nan, y haci nan sinti nan mes bon, ta admirable y inolvidable.

Schutterij cu pueblo di Aruba a despegar durante e añanan di 1940 te 1947, e manera cu SCHUTTERMAN Y PUEBLO a traha conhuntamente den defensa di Aruba, cada un haciendo su parti, e Schutterman dunaendo defensa y proteccion, y e pueblo, na un manera sublime, apoyando nan, pa tene nan mes: "al halto, enberdad a compra e veracidad di e palabranan: "nikito di tamaño, pero grandi y noble di curazon."

Den historia di tur pais civiliza e tempo di sucesonan extraordinario, especialmente e tempo di gera, ta worde skirbi y describi cu hopi atencion. Especialmente e manera com e a comporta su mes. E comportacion aki ta duna un indicacion di e carácter di e pueblo. Tin pueblo cu bati di circunstancias, ta actua na un manera preocupá, of ta perde valor y bira apático. Na hopi pais, ora soldadnan ta haya un sueldo mashá abao, y e tempo cu nan ta haya e sueldo aki ta dura largo, nan ta rebelar, amolina, y comete actonan criminal. E manera cu Aruba a actua, calmo, sereno y uni, por sirbi di ehempel pa cualkier pais.

No por a ripara, y mayoria di hende no tabata sa mes cu Aruba tabata bati di amenaza. Ta na e black-out por a ripara cu Aruba tabata den estado di gera.

E historia di Schutterij ta inquebrantablemente asociá cu e comportacion di pueblo den e añanan 1940 pa 1947. Den historia di Aruba e añanan aki, e añanan di gera (y di Schutterij), merece di worde skirbi cu letter di oro.

Schutterij tabatin algo unificador. Tabatin Schutter di tur e islanan Hulandes, y di varios pais grandi. Nan tabata simpatisante di tur e partido politiconan, pero ora tabata trata di Aruba, tur tabata animá pa un solo determinacion: Si Aruba worde ataca, nan lo defende Aruba te na morto.

Schutterij tabatin un atraccion perdurable.

Si unavez bo tabata den Schutterij, semper lo bo keda corda riba e tempo ei como un tempo valioso. Loke e tempo ei tabata parce un amargura, awor ta parce un aventura. Hopi ex-

Schutter ta pensa cu un cierto añoranza riba e tempo di dienst. Varios ex-Schutter a bisa mi cu aunque e tempo di dienst tabata duro, nan lo contento cu nan tabata den dienst, especialmente pa e disciplina cu nan a haya den dienst. Despues di Schutterij mi a sirbi den varios otro Cuerpo Militar, mucho mas grandi, potente y moderno cu Schutterij. Mi a gana mucho mas cu mi por a gana den Schutterij. Pero e recuerdonan mas grato di mi bida militar, ta e añanan pasá den Schutterij. E disciplina di Schutterij tabata legendario. Pero kico ta disciplina?

Disciplina tin varios aspecto, entre otro:

1. Disciplina por manifesta su mes den comportacion. Un persona disciplinada den e aspecto aki, la esun cu ta comporta su mes cu respet; e tin sentido di responsabilidad, bolutad pa traha.

2. Puntualidad. Si ta nuebo'or parada mester cuminsa, cuminsé nuebo'or, y no nuebo'or y un minuut. Si ta sief'or mester cuminsa traha, cuminsa traha sief'or y no un minuut pasá di sief'or.

3. Deber mester cu placer. Un estudiante promer haci un tentamen aki un siman. E sa, cu pa e pasa e tentamen bon, e mester studia hopi ainda. Pero net tres dia promer cu tentamen, tin un fiesta grandi cu bo no por keda sin bay. Tur e otro studiantenan la bisé: "Bani!" Un estudiante disciplina ta keda sin bay fiesta pa e studia.

Schutterij haci bo trabao a fondo (grondig). E aspecto aki ta di gran importancia den servicio militar. Si un manobra ta exigí pa bo haci diez cos, haci tur diez, den e debida secuencia; tur diez, semper, tambe esun cu ta parece menos importante. Si bo descuidá un bez, e consecuencia por ta fatal. Schutterman tabata disciplinada den tur aspecto. Nan tabatin un disciplina total.

Laga mi duna un ehempel di falta di disciplina den e aspecto menciona bao di number cuater.

Dia cu e submarino Alemán, cu un tripulacion cu a worde entrená especialmente pa bula e refinaria di Lago, tabata na punto di cumpli cu nan mision, ya Hitler tabata ansioso wardando e momento cu e por a participa na mundo e hazaña mas intrépido, mas espectacular di Segunda Gera Mundial: Destrucion di e refinaria mas grandi di mundo, na Aruba. Pero ora e hendenan aki, cu a haya un training intensivo pa haci esaki, kier a cumpli cu nan mision, nan a haya bierbaramente, pa falta disciplina. Ora submarino ta bay bati di e loop di e cayón pa e cayón no jena cu awa. Ora e submarino subi atrobe y mester tira, mester kita e tapa promer cu tira. Nan no a kita e tapa. Ora cu e parti dilanti di e bala a dal contra e tapa, e carga den e bala a explota den e loop, bati e loop y mata hende. E cayón no tabata sirbi mas. Un imperdable falta di disciplina. E cos ei NUNCA por a pasa cu Schutterman di Schutterij Aruba. Nan si tabatin un disciplina total. Nan tabata mas bon controlá y mas bon disciplinada cu e militar Alemán ei.

Realiza esaki bon: UN CUERPO MILITAR MAS BON DISCIPLINA CU SCHUTTERIJ ARUBA NO TIN!

Laga nos mira e disciplina di Schutterij Aruba poco mas di acerca. Tabata algo sobresaliente.

Unda na mundo bo ta haya un grupo di hende cu la dispuesto pa haci asina hopi ora di trabao, sin un cen di overtime, siete aña largo, sin nunca protesta?

Oi, traha asina duro, lastrando riba tera, riba calichi, wangle, cadushi derá bati di santo, train te sangra y herida bo elleboog, den solo cayente, sin nunca protesta?

Unda na mundo bo ta haya un grupo di hende cu la dispuesto pa defende y sigura tranquilidad y oportunidad di sesenta nacionalidad di hende pa nan gana salario mashá grandi mes, mientras nan tabata gana solamente 4.20 pa siman, siete aña largo, sin nunca kien of rebela?

Kico tabata e secreto cu, apesar di e circunstancianan aki, nan por a mantene un moral asina halto? E secreto tabata e tremendo apoyo moral cu Schutterman a haya di henter pueblo di Aruba. Henter Aruba a "nse lo tin e ocasion," a eleva su mes pa enfrenta e situacion. No importa cuanto ora, of ki duro nan a traha, of cuanto nan a

cansa, ora nan bay "passagier" unda cu nan pasa nan tabata bon mira y admirá, cerca hende di edad avanza, of hende hoben, especialmente cerca e hobencianan. Esei tabata duna nan brio y corahe pa sigui haci nan dienst cu tur nan energia. Nan tabata sabi cu henter Aruba tabata duna nan un gran acogida. E acogida tabata asina bon, cu hopi bierbaramente jaloers. Nan no por a comprende cu tanto hobencia tabatin asina hopi aprecio pa Schutterman cu tabata gana sola mente 4.20 pa siman. Nan tabata spierta e hobencianan cantando: "Cuater binti n' por paga huur di cas. Cuater binti n' por compra un bon shimis." Schutterman na e preocupacion, na e sigui sirbi patria cu mes un brio y afán y nan tabata canta: "Schutterman n' tin cuenta cu machi n' kier."

Ora nos pensa di e disciplina di Schutterij, nos mester pensa tambe riba e tremendo acogida, e RECONOCIMIENTO Y APRECIO cu Aruba di e tempo ei a duna. Sin e apoyo di pueblo di Aruba, e disciplina ei lo no tabata posibel.

E historia di e época di 1940 pa 1947, e época di Schutterij, ta mas importante cu hopi hende la realiza. E historia ta importante pasobra no solamente e ta duna un descripcion di e estado económico di Aruba di e tempo ei, e expansion di Lago, cu hende di hopi pais a bini aki, pero especialmente pasobra e ta duna un bista riba HENDENAN, por cierto e elemento mas importante di un pais. E describi e comportacion di e pueblo y for di e descripcion aki esun cu lesé, aki na cien of dos cien aña, ta haya un bista riba carácter di e pueblo di Aruba, su forza mental, su capacidad pa keda sereno y uni ora la trata di asuntunan vital pa Aruba.

E historia ta duna tambe un bista riba e hobennan di e tempo ei, com, pa defende Aruba, nan tabata dispuesto pa traha hopi duro y gana mashá poco, mientras tur otro hende tabata gana mashá hopi, pasobra despues di Estados Unidos, Aruba tabata e sueldo mas halto di mundo. Tambe, historia di Aruba di e tempo ei por muestra cu e Schutterman y e pueblo di Aruba por sirbi como guia y ehempel com pa comporta den tempo difícil. Schutterman por sirbi como ehempel di disciplina, tambe aki na Aruba.

Papiando di e disciplina y e nivel halto di entrenamento di Schutterij, nos mester menciona e number di Aduyadant der Mannieren, Ruiter, un hombre streng y exigente, di gran capacidad y un disciplina-propio di her. El a pone su mes e tarea pa haci di Schutterij di Aruba un tremendo Cuerpo Militar, bon disciplinada y entrena, capaz pa pelea contra cualkier Cuerpo Militar di mundo. E proverbio ta bisa: "Woorden wekken, voorbeelden trekken." E calidad di Aduyadant Ruiter, su disciplina-propio, su capacidad y dedicacion tabatin un gran influencia riba Schutterman en general, y riba kader en particular. Inconscientemente nan tabata sigui sirbi ehempel. Nan tabata alumno fanfático.

Nan tabata absorbe enseñanza y ehempel di e gran instructor aki, manera spons ta absorbe awa. Resultado: Schutterij di Aruba, e Cuerpo Militar mas bon disciplinada di mundo!

Pero awor Schutterij ta lubida y ignorá. Esei no por, esei no mag! Schutterij la parti di historia di Aruba.

Ignora Schutterij la ignora historia di Aruba. Un pueblo cu ignora su historia no conoce y, consecuentemente, no por aprecia su pasado, y e no tin guia pa determina su futuro. E ta perde rumbo y ta bay den caminda robaz.

Ignora Schutterij ta un ingratitude pa cu e Schutterman, kende, durante e tempo cu Aruba tabata bati di amenaza y na peliger, a defende Aruba cu gran dedicacion y energia, cu hopi inconveniencia pa nan mes.

Ignora Schutterij ta un injusticia pa cu e mayoran y e familiarian di e Schutterman kende a haci hopi sacrificio pa mantene di un te cinco yiu den servicio militar, defendiendo patria.

Ignora Schutterij ta falta di comprension pa cu henter pueblo di Aruba di e tempo ei, cu si a sa di apoya y

reconoce Schutterman di moda cu nan por a sigui sirbi patria.

Nos no ta mira e ex-Schutterman camina tur caminda keha cu nan no ta worde reconocí. Pero no laga nos e kiboka nos mes. Den profundo di nan curazon tin un rincón cu ta clama pa haya reconocemento. Esei ta inherente na naturaleza humano. Si un hende haci un bon trabao, e ta desea di worde reconocí. Tuma, por ehempel, un artista. Si, ora e duna un bon concierto, haci un bon presentación, e haya un "staande ovatie," ta manera cielo a habri p'e. Despues di binti cinco aña e no ta corda mas cuanto placa el a gana e dia ei. Pero loke hamas e lo lubida, ta e staande ovatie. Esei ta e RECONOCIMIENTO di e bon presentación cu el a duna. Aplauso ta pa un artista loke gasolin ta pa motor di un auto. E aplauso aki ta duna mas brio y entusiasmo. E ta haci su best pa otro bina e haci un mehor presentación ainda, compone pieza mas bonita ainda. E aplauso cu nos ta duna nos artistanan, la yuda pa alza e nivel di nos arte.

Schutterman tambe kier worde reconocé.

Nan no a traha duro y liel pa defende Aruba tempo di amenaza y peliger?

Nan no a zorg cu ningun hende por a destrui of sabotear e suministro di awa y electricidad, of e servicio di telefonia y telefonia?

Nan no a zorg pa tur hende por a traha tranquil y gana hopi placa mientras nan mes tabata gana no mas cu 4.20 pa siman?

Aruba tin hopi motibo di ta orguyoso di su Schutterij. E Schutterman di Infanteria ligera tabata diestro y den pelea di hombre contra hombre nan por a enfrenta cualkier Cuerpo Militar di mundo. E Schutterman di Zware Wapens tabata e mehoran di mundo den maneño di e cayón P.A.G.

E deportacionan di Schutterij tabata entre e mehoran di Aruba. E team di voetbal di Schutterij tabata practicamente e team nacional di Aruba.

Varios di e mehor artistanan di Aruba tabata Schutterij.

Schutterij di Aruba tabata un di e Cuerpo Militarman mas bon disciplinada di mundo.

Esaki ta pa mi e mérito mas grandi di Schutterij. Ora e Schutterman a sali for di dienst, nan a sali cu nan disciplina. Unda cu nan a bay, la bon trabao nan a haci, como hombre disciplinada. Tin cu a bay traha den industria, y a bira experto den nan ramo. Tin cu a bay traha den comercio. Otro a bira traha den Gobierno. Otro a bira Ministro di e Nederlanden Antillen, incluyendo Aruba. Tin cu a bira Gezaghebber di Aruba. Tin cu a haci un estudio profundo di ley y a skirbi hopi buk cu la worde consultá door di estudiante y profesional. Tin cu a dedica su mes na comunica cu pueblo, teniendo un programa na radio, tur dia, afia tras afia.

Na otro pais nan ta honra y hasta traha monumento pa cada hopi cu a worde usa den gera y a haci un bon trabao. Aki na Aruba nos ta honra hopi figura historico door di duna nos cayanen nan nombre.

Teniendo tur e cosnan aki na cuenta nos mester yega na e conclusion cu Schutterij merece di worde reconocí y di tal manera cu e lo no worde lubida hamas. Esaki la pidi pa nos engi un monumento na honor y reconocemento di Schutterij.

Un monumento DIGNO! Un monumento cu lo ta manera un centinela eterno, cu la vigila y salvaguarda e balornan di antaño cu tan sublimemente Schutterij a manifesta: disciplina, respet, sentido di responsabilidad, bolutad pa traha.

Un monumento cu lo ta manera un señal visibel di e determinacion di cada Schutter pa defende Aruba hasta su último aliento, hasta su último gota di sangar.

Un monumento cu, aunque mudo, lo ta manera un testigo eloquente, dunaendo testimonio cu, aunque físicamente e Schutter no l'e'i mas, su espíritu si l'e'i, espíritu di dedicacion, fealdad y lealdad den defensa di patria, convirtiendone den realidad e dicho: "Old soldiers never die, they just fade away." Soldá bieu di ta muri nunca, nan ta dijs desvanecer.